



Сарыағаш

АУДАНЫҚ ҚОҒАМДЫҚ-САЯСИ ГАЗЕТІ

Газет оқу - зиялылықтың белгісі!



Жұма, 7 қараша 2025 жыл №45 (12033)

e-mail: saryagash-gazeti@mail.ru
facebook «Сарыағаш Газеті»

96
ЖЫЛ

Газет 1929 жылдан шыға бастады

• Ақорға

ҚАЗАҚСТАН РЕСПУБЛИКАСЫ ІШКІ САЯСАТЫНЫҢ НЕГІЗГІ ҚАҒИДАТТАРЫ, ҚҰНДЫЛЫҚТАРЫ МЕН БАҒЫТТАРЫ БЕКІТІЛДІ

Қасым-Жомарт Тоқаев «Қазақстан Республикасы ішкі саясатының негізгі қағидаттары, құндылықтары мен бағыттарын бекіту туралы» Жарлыққа қол

қойды.

Ұлттық құрылтайдың IV отырысында сарапшылар мен қоғам қайраткерлері ішкі саясат саласында жүргізіліп жатқан

барлық жұмысты реттейтін бірыңғай тұжырымдамалық құжат әзірлеуді ұсынған еді. Президент бұл идеяны қолдап, оның мемлекеттік құрылымдар жұмысын жүйелендіруге бағытталуы керек екенін атап өткен болатын.

Президент Өкімшілігі мен мүдделі мемлекеттік органдар Мемлекет басшысының жыл сайынғы Жолдауларын, сөйлеген сөздерін, Қазақстан Республикасының 2029 жылға дейінгі ұлттық даму жоспарын негізге ала отырып, «Ішкі саясаттың негізгі қағидаттары, құндылықтары мен бағыттары»

құжатындайындады.

Тұжырымдамалық құжатты әзірлеуге Ұлттық құрылтайдың мүшелері, сарапшылар, ғылыми және қоғамдық ұйымдардың өкілдері белсене атсалысты.

Аталған құжат бірінші кезекте мемлекеттік органдарға арналған. Оның басты мақсаты – ішкі саясат саласындағы жұмысты жүйелеу әрі үйлестіру.

Онда «Заң және тәртіп», «Халық үніне құлақ асатын мемлекет», «Түрлі көзқарас – біртұтас ұлт», «Күшті Президент – ықпалды Парламент – есеп беретін Үкімет», «Адал азамат»,

«Таза Қазақстан» секілді ішкі саясат қағидаттары қамтылған.

Сондай-ақ Ұлттық құрылтай отырыстарында көтерілген жалпыұлттық құндылықтардың тізбесі енгізілді. Жалпыұлттық бірегейлікті танытатын ұлттық нышандар жүйесі жасалды.

Құжатта қоғамдық диалог, этносаралық қатынас, дін, мәдени-гуманитарлық, отбасы, жастар, ақпарат секілді ішкі саясаттың басым бағыттары айқындалған. Қабылданған тұжырымдамалық құжат мемлекеттік органдардың ішкі саясат саласындағы жұмысын ұйымдастыруға негіз болады.



• Энергия көзі

СҰЙЫТЫЛҒАН МҰНАЙ ГАЗЫНЫҢ ЖЕТКІЗІЛУІ ТҰРАҚТЫ БАҚЫЛАУДА

Сұйытылған мұнай газы еліміз бойынша ҚР энергетика министрлігі тарапынан белгіленген көлемде бөлінеді.

Түркістан облысында бүгінде сұйытылған мұнай газын тарату және сату ісімен 50-ге жуық кәсіпкерлік субъектісі айналысады. Белгіленген баға шегінде 1 литр газдың құны 102–107 теңге аралығында сақталуда.

Атырау мұнай өңдеу зауытының биылғы қазан айындағы жоспарлы жөндеу жұмыстарына байланысты еліміздің бірқатар өңірлерінде сұйытылған газ тапшылығы байқалды. Бұл – өндіріс процесіне қажетті техникалық шараларға байланысты уақытша ғана орын алған жағдай. Қазіргі таңда

зауыттағы жөндеу жұмыстары қарқынды жүріп жатыр және қараша айының алғашқы онкүндігінде толық аяқталады деп жоспарлануда. Осыдан кейін барлық өңірлерде сұйытылған газдың жеткізілу көлемі мен тұрақтылығы қалпына келтіріледі.

Осы жылдың қараша айына Түркістан облысына барлығы 11 880 тонна сұйытылған мұнай газы бөлінген.

Оның ішінде:

ПКОП (Павлодар мұнай-химия зауыты) – 9 180 тонна, СНПС-Ақтөбемұнайгаз – 2 700 тонна.

Бүгінгі таңда облысқа сұйытылған мұнай газын жеткізу жұмыстары жоспарлы түрде жүзеге асуда. 1–3 қараша аралығында өңірге 32 вагон

немесе 1 085,65 тонна газ жөнелтілді. Қалған көлемдер бекітілген кестеге сәйкес айдың соңына дейін толық жеткізілетін болады.

Облыс және аудан, қала әкімдіктері тарапынан сұйытылған мұнай газының бөлінуі, жеткізілуі және сатылу бағасы қатаң бақылауға алынған. Тұтынушыларға қолжетімді бағаны сақтау, әлеуметтік тұрақтылықты қамтамасыз ету және халықтың қажеттілігін өтеу бағытындағы жұмыстар үздіксіз жүргізіліп келеді.

Жалпы алғанда, қалыптасқан жағдай уақытша сипаттағы, жоспарлы жөндеу жұмыстарына байланысты орын алған мәселе. Энергетика министрлігі, жергілікті



атқарушы органдар және газ таратушы кәсіпорындар бірлесе отырып, жағдайды тұрақтандыру бойынша нақты шараларды іске асыруда.

Алдағы күндері Түркістан облысы тұрғындарына

сұйытылған мұнай газының жеткізілуі толық қалыпқа келіп, тұрақты және үздіксіз қамтамасыз етіледі.

Түркістан облысы әкімінің баспасөз қызметі

• Биілік пен бұқара

АУДАН БАСШЫСЫ ТҰРҒЫНДАРМЕН КЕЗДЕСУДЕ

Апта басынан Сарыағаш ауданының әкімі Арман Абдуллаев жоспарланған тұрғындармен кездесуі Ақжар және Дербісек ауылдық округтерінен басталды.

Ақжар ауылдық округінен басталған іссапар кездесу алдында инфрақұрылыммен қамту бағытында атқарылған жұмыстардың нәтижесін пысықтады. Аудан басшысы жұмыстардың сапасын бағалап, анықталған кемшіліктерді дер кезінде қалпына келтіруді жауапты мердігерлерге тапсырды. Бақылауды ауылдық округ әкімі Серік Спатаевқа жүктеді.

Аудан әкімі Бағыс елді мекеніне қарасты Егемендік, Түркістан, Бейбітшілік және Алматы көшелерінде жүргізілген

жарықтандыру жұмыстарының сапасын тексерді. Аталған жұмыстардың мердігері – «Energo ВЭС» ЖШС. Құрылыс жұмыстары 2025 жылдың маусым айында басталып, қазіргі таңда толық аяқталған.

Сонымен қатар Ақжар ауылдық округінің Д.Қонаев көшесінің бойында темірбетон суағар (науа) орнату жұмыстарын «Baikun Company» ЖШС жүзеге асырды. Оған қоса, Бағыс елді мекенінің ішкі көшелеріне асфальт жамылғысын төсеу жұмыстары атқарылған.

Сарыағаш ауданының әкімі Арман Абдуллаев Ақжар ауылдық округінің тұрғындарымен кездесу барысында 2025 жылдың екінші жартыжылдығының

қорытындысын шығарып, ауданның әлеуметтік-экономикалық даму көрсеткіштері мен атқарылған жұмыстар жөнінде кеңінен баяндады. Сондай-ақ, алдағы жоспарлар туралы да айтты.

Тұрғындар атқарылған жұмыстарға оң бағасын беріп, ауыл ақсақалдары аудан басшысына ақ батасын берді.

Алдыңғы кездесулерде тұрғындар тарапынан көтерілген мәселелер бойынша арнайы іс-шаралар жоспары әзірленіп, бірқатар жұмыстар атқарылып, өз шешімін тапты.

Ақжар ауылдық округіне қарасты Ақжар елді мекені арқылы өтетін КХ-49 облыстық маңызы бар жолдың 25-шақырымындағы

Ханым каналынан өтетін көпірге орташа жөндеу жұмыстары жүргізілді. Жөндеу жұмыстарының мердігері – «MARDEN Group» ЖШС.

Кездесуден кейін аудан әкімі тұрғындарды жеке қабылдап, олардың талап-тілектерін тыңдады. Әрбір сұраққа заң аясында жауап беріліп, көтерілген мәселелер тиісті сала мамандарына тапсырылды.

Арман Абдуллаевтың 2025 жылдың екінші жартыжылдығына арналған тұрғындармен кездесуі Дербісек ауылдық округінде жалғасын тапты.

Аудан басшысы Арман Айдарұлының Дербісек ауылдық округіндегі кездесуі жаңа

Жалғасы 2-бетте

Баспасөз-2026

«САРЫАҒАШ» ГАЗЕТІНЕ ЖАЗЫЛЫҢЫЗ

Құрметті оқырман! 96 жылдық тарихы бар аудандық «Сарыағаш» қоғамдық-саяси газетіне 2026 жылдың бірінші жартыжылдығына газет-журналға жазылу науқаны келді. Аудан тынысынан ақпар беретін, «Жаңа Қазақстанды» құруға бағытталған маңызды жоспарлардың орындалу барысын хабарлап, ұлттық руханиятымыз бен салт-дәстүріміз, терең тарихымызды жаңғырту, сондай-ақ ұрпақ тәрбиесі жайында тағылымды дүниелерді ұсынып отырған өз өңіріңіздің бас басылымы – «Сарыағаш» газетіне жазылыңыз.

6 ай мерзімге жазылу бағасы:

«Қазпошта» АҚ арқылы – 3208,80 теңге. «ERNUR-press» ЖШС арқылы – 3030 теңге. «Экспресс-пошта» ЖШС арқылы – 3208,80 теңге.

Редакция арқылы тікелей жазылу құны – 2300 теңге (50 данадан артық болса)



Ежелден ел тілегі – ер тілегі.

Бақыржан МОМЫШҰЛЫ

